



Հայրենադարձության եւ հիմնավորման հասարակական կազմակերպությունների միություն
«Yerkir» Union of Non-governmental Organizations for Repatriation and Settlement
Union des associations «Yerkir» pour le peuplement et la réinsertion
Союз общественных организаций «Еркир» по репатриации и освоению

Երեւան, Սայաթ-Նովա 12, բն 4

Հեռ.՝ (+374 10) 46 48 28

Կայք՝ www.yerkir.org

Էլ. փոստ contact@yerkir.org

Yerevan, 12 Sayat-Nova, apt. 4

Tel: (+374 10) 46 48 28

Web: www.yerkir.org

E-mail: contact@yerkir.org

Մամլո հաղորդագրություն

Կապ՝ Ռոբերտ Թաթոյան

Բջջ՝ (+374 94) 36 17 93

Էլ. փոստ՝ rob@yerkir.org

Երեւան,

Հոկտեմբերի 24, 2008թ.

Վրացական իշխանությունների կողմից հայ փոքրամասնության իրավունքների խախտման նոր փաստեր

*Վրաստանում գործող բոլոր միջազգային
կազմակերպություններին, դեսպանություններին եւ
իրավապաշտպան կառույցներին*

Հակառակ Վրաստանի իշխանությունների կողմից եթնիկական փոքրամասնությունների իրավունքների պաշտպանության գծով ստանձնած միջազգային պարտավորությունների, փոքրամասնությունների խնդիրներին լուծում տալու տարբեր միջազգային կառույցների, այդ թվում՝ ՄԱԿ-ի մարդու իրավունքների հանձնաժողովի, ինչպես նաեւ մի շարք իրավապաշտպան կազմակերպությունների հորդորներին եւ հանձնարարականներին՝ վրացական իշխանությունները շարունակում են անտեսել եւ արհամարհել հայ փոքրամասնությանը հուզող խնդիրները, ավելին՝ մի շարք քայլերով էլ ավելի են սրում լարվածությունն ու դժգոհության մթնոլորտը:

Այսպես, թեւեւ Հայ Առաքելական Եկեղեցու Վիրահայոց թեմը պահանջում է իրեն վերադարձնել խորհրդային ժամանակաշրջանում բռնազրաված տաճարները, եւ մասնավորապես՝ Թիֆլիսի Սբ. Նորաշեն եկեղեցին, թեւեւ այդ պահանջը օրինական է ճանաչվել բազմաթիվ միջազգային ատյանների եւ իրավապաշտպան կազմակերպությունների կողմից, վրացական իշխանությունները ոչ միայն անտեսում են այն, այլ ընդհակառակը՝ արտոնում հարեւան վրացական եկեղեցու սպասավորներին իրականացնել շինարարություն Սբ. Նորաշենի անմիջական հարեւանությամբ, որի նպատակն է շենքի վերջնական բռնազավթումը Վրաց Ուղղափոռ Եկեղեցու կողմից:

Այս տարվա մայիս ամսին շնորհիվ Թիֆլիսի հայ համայնքի բողոքի ցույցի, Վիրահայոց թեմի դիմումների եւ վիրահայ եւ հայաստանյան հասարակական կազմակերպությունների, այդ թվում նաեւ՝ «Երկիր» միության հայտարարությունների՝ հաջողվեց առժամանակ կանգնեցնել Սբ. Նորաշենը շրջապատող պատի շինարարությունը: Սակայն մի քանի օր առաջ շինարարական աշխատանքները վերսկսել են, ընդ որում՝ նոր թափով /տե՛ս կից ներակայացվող լուսանկարները/:

Սբ. Նորաշեն եկեղեցու շուրջ տեղի ունեցող գործընթացներին զուգահեռ վրացական իշխանությունները, ոտնահարելով ժողովրդավարության եւ մարդու իրավունքների տարրական նորմերը, շարունակում են քաղաքական ենթատեքստ ունեցող քրեական գործեր

հարուցել ջապախքահայության շրջանում ժողովրդայնություն վայելող գործիչների նկատմամբ:

Այսպես, մտացածին մեղադրանքների հիման վրա 2.5 տարվա ազատազրկման է դատապարտվել «Միասնական Ջապախք» ժողովրդավարական դաշինք» քաղաքական շարժման անդամ Արթուր Պողոսյանը, հետախուզման մեջ է հայտարարված Գուրգեն Շիրինյանը, իսկ նրա հայրն ու հորաքույրը կալանքի տակ են: Կալանքի տակ դատի են սպասում «Միասնական Ջապախք»-ի առաջնորդ Վահագն Զախալյանը եւ նրա անչափահաս եղբայրը, նրանց հայր՝ Ռուբեն Զախալյանը ազատ է արձակվել գրավի դիմաց:

Շարունակվում են չլուծված վիճակում մնալ նաեւ հայ փոքրամասնությանը հուզող այլ խնդիրներ.

- Հայ Առաքելական Եկեղեցու վիրահայոց թեմը շարունակում է զրկված լինել պետական գրանցումից.
- Վիրահայությունը, եւ հատկապես համախումբ Ջապախքում բնակվող նրա հատվածը, շարունակում է թերի ներկայացված լինել հանրային կյանքի բոլոր ոլորտներում.
- Շարունակում են գործել օրենքները, որոնք պարտավորեցնում են փոքրամասնություններին հանրային գործունեության բոլոր ոլորտներում՝ ինքնակառավարման մարմիններում, տեղական վարչական մարմիններում եւ տեղական կրթական համակարգում, օգտագործել բացառապես վրացերենը.
- Տեղական վարչական, կրթական եւ այլ մարմիններում պաշտոնների նշանակումը շարունակվում է փոխկապակցված մնալ վրացերենի իմացությանը:

Այն պայմաններում, երբ Վրաստանը փորձում է ապաքինվել ռուս-վրացական հակամարտության հետեւանքներից եւ ազդարարել է երկրի ժողովրդայնացման եւ օրենքի իշխանության հաստատմամբ ուղղված բարեփոխումների նոր փուլի մեկնարկի մասին, հայ փոքրամասնության նկատմամբ նման վերաբերմունքը էլ ավելի անտրամաբանական եւ տարօրինակ է թվում:

Հաշվի առնելով վերոնշյալ փաստերը՝ «Երկիր» միությունը դիմում է ՄԱԿ, ԵԱՀԿ, Եվրամիության եւ Եվրախորհրդի համապատասխան մարմիններին, ինչպես նաեւ համապատասխան միջազգային կառույցներին եւ իրավապաշտպան կազմակերպություններին՝ ջապախքահայության եւ վիրահայության նկատմամբ Վրաստանի իշխանությունների ներկա խտրական քաղաքականությունը զսպելու ուղղությամբ անհապաղ եւ ուղղակի միջոցներ ձեռնարկելու, քաղաքական հետապնդումներին վերջ տալու եւ հայ փոքրամասնության խնդիրների լուծմանն օժանդակելու կոչով, եւ մասնավորապես՝

- Վերջին շրջանում Ջապախքում կալանավորված բոլոր քաղաքական բանտարկյալների ազատ արձակմանը, նրանց նկատմամբ հարուցված բոլոր քրեական գործերի կարճմանը
- Ջապախքում օրենքի իշխանության հաստատմանը եւ հայ բնակչության անվտանգության եւ զարգացման իրական երաշխիքների տրամադրմանը
- Կրոնի ազատության հաստատմանը եւ Հայ Առաքելական Եկեղեցու իրավաբանական գրանցմանը
- Բռնագրավված հայկական եկեղեցիների իրենց օրինական տերերին վերադարձմանը
- Վարչական միավորներում, որտեղ հայ բնակչությունը մեծամասնություն է կազմում, հանրային կյանքի բոլոր ոլորտներում օրենսդրությամբ Հայոց լեզվի օգտագործմանն արտոնմանը:

Միջազգային հանրությունը պարտավոր է անհապաղ միջոցներ ձեռնարկել, որպեսզի հնարավոր լինի խուսափել իրավիճակի հետագա սրումից եւ խոչընդոտել առճակատման նոր օջախի առաջացմանը:

Հավելված. Սբ. Նորաշենի շուրջ պատի շինարարությունը /18.10.2008/

